

I. DISPOSICIÓN XERAIS

MINISTERIO DE ECONOMÍA E FACENDA

19670 *Real decreto 1817/2009, do 27 de novembro, polo que se modifican o Real decreto 1245/1995, do 14 de xullo, sobre creación de bancos, actividade transfronteiriza e outras cuestións relativas ao réxime xurídico das entidades de crédito, e o Real decreto 692/1996, do 26 de abril, sobre o réxime xurídico dos establecementos financeiros de crédito.*

Este real decreto desenvolve a modificación operada na Lei 26/1988, do 29 de xullo, sobre disciplina e intervención das entidades de crédito, pola Lei 5/2009, do 29 de xuño, pola que se modifican a Lei 24/1988, do 28 de xullo, do mercado de valores; a Lei 26/1988, do 29 de xullo, sobre disciplina e intervención das entidades de crédito, e o texto refundido da Lei de ordenación e supervisión dos seguros privados, aprobado polo Real decreto legislativo 6/2004, do 29 de outubro, para a reforma do réxime de participacións significativas en empresas de servizos de investimento, en entidades de crédito e en entidades aseguradoras, en diante, Lei 5/2009, do 29 de xuño. Esta Lei 5/2009, do 29 de xuño, inicia a transposición ao ordenamento xurídico nacional da Directiva 2007/44/CE do Parlamento Europeo e do Consello, do 5 de setembro de 2007, pola que se modifican a Directiva 92/49/CEE do Consello e as directivas 2002/83/CE, 2004/39/CE, 2005/68/CE e 2006/48/CE no que incumbe ás normas procedementais e aos criterios de avaliación aplicables en relación coa avaliación cautelar das adquisicións e dos incrementos de participacións no sector financeiro. Agora complétase a transposición con este real decreto no que ás entidades de crédito se refire.

A Directiva 2007/44/CE ten por obxectivo mellorar o réxime de participacións significativas incrementando a seguranza xurídica e dotándoo dunha maior claridade. O dito réxime aborda a avaliación cautelar das adquisicións de participacións que poidan supor o exercicio dunha influencia notable nas entidades financeiras. Supón, en definitiva, un control administrativo previo que ten por obxecto avaliar, para efectos prudenciais, a identidade, a honorabilidade e a solvencia dos accionistas máis significativos das entidades.

En particular, a Directiva 2007/44/CE regula os procedementos e criterios conforme os cales se realiza a avaliación das participacións significativas. A Lei 5/2009, do 29 de xuño, incorpora ao ordenamento xurídico español os aspectos esenciais desta directiva, como son, por unha banda, os criterios que a autoridade supervisora deberá observar á hora de avaliar unha modificación da estrutura accionarial que afecte as participacións significativas e, por outro, o propio procedemento de non oposición.

Este real decreto completa a transposición da dita directiva regulando, entre outras cuestións, como se deberán computar as participacións en entidades de crédito para determinar o que se considera unha participación significativa (punto tres do artigo 1). Prevé, así mesmo, a elaboración e publicación dunha lista por parte do Banco de España na cal se determinará o contido da información que este poderá exixir para avaliar a adquisición dunha participación significativa (punto catro), ao tempo que neste mesmo real decreto se enumeran xa os aspectos fundamentais aos cales necesariamente deberá facer referencia a dita lista.

O real decreto estende tamén o réxime de participacións significativas ao procedemento de creación dun banco ou dun establecemento financeiro de crédito. Efectivamente, o punto un do artigo 1 obriga a ministra de Economía e Facenda a denegar a autorización da creación dun banco cando non se considere adecuada a idoneidade dos accionistas que vaian ter nela unha participación significativa, e o punto dous do artigo 2 introduce a mesma obriga para os establecementos financeiros de crédito.

O desenvolvemento regulamentario introducido afecta ademais o procedemento de non oposición dunha modificación na estrutura accionarial que afecte as participacións significativas, en canto que se faculta o Banco de España no punto cinco do artigo 1 para interromper o prazo de avaliación por un máximo de trinta días hábiles, cando o adquirente potencial sexa unha entidade autorizada ou domiciliada fóra da Unión Europea ou cando non estea suxeito a supervisión financeira en España ou na mesma Unión Europea.

Pola súa banda, os puntos dous e seis do artigo 1 e o punto un do artigo 2 introducen modificacións, respectivamente, na obrigaición do Banco de España de lles comunicar á Comisión Europea e ás autoridades competentes dos demais Estados membros as transmisións de accións ou achegas dunha entidade de crédito que impliquen cambios no control da entidade. Así mesmo, suprímense a facultade da ministra de Economía e Facenda de denegar a autorización de creación dun banco en ausencia de reciprocidade con países terceiros e a obrigaición do Banco de España de informar a Comisión Europea e o resto de autoridades supervisoras da estrutura do grupo en caso de control por accionistas de países terceiros. Con este real decreto elimínanse as ditas obrigaicións e facultades, que traían causa da transposición da segunda Directiva do Consello 89/646/CEE, do 15 de decembro de 1989, sobre a coordinación das disposicións legais, regulamentarias e administrativas relativas ao acceso e ao exercicio da actividade das entidades de crédito e pola que se modifica a Directiva 77/780/CEE, e da súa refundición na Directiva 2000/12/CE do Parlamento Europeo e do Consello, do 20 de marzo de 2000, relativa ao acceso á actividade das entidades de crédito e ao seu exercicio. Ambas as directivas foron derogadas, e a Directiva 2006/48/CE do Parlamento Europeo e do Consello, do 14 de xuño de 2006, relativa ao acceso á actividade das entidades de crédito e ao seu exercicio (refundición), que regula actualmente a materia, non contén xa obrigaicións análogas.

Este real decreto dítase ao abeiro da disposición derradeira sétima da Lei 5/2009, do 29 de xuño, en que se habilita o Goberno para ditar cantas disposicións sexan necesarias para o desenvolvemento, execución e cumprimento do previsto na propia lei.

Na súa virtude, por proposta da ministra de Economía e Facenda, de acordo co Consello de Estado e logo de deliberación do Consello de Ministros na súa reunión do 27 de novembro de 2009,

DISPOÑO:

Artigo primeiro. *Modificación do Real decreto 1245/1995, do 14 de xullo, sobre creación de bancos, actividade transfronteiriza e outras cuestións relativas ao réxime xurídico das entidades de crédito.*

O Real decreto 1245/1995, do 14 de xullo, sobre creación de bancos, actividade transfronteiriza e outras cuestións relativas ao réxime xurídico das entidades de crédito, queda modificado como segue:

Un. O primeiro parágrafo e a letra a) do punto 1 do artigo 4 quedan redactados do seguinte modo:

«1. A ministra de Economía e Facenda, mediante resolución motivada, denegará a autorización de creación dun banco cando non se cumpran os requisitos dos artigos 2 e 3 e, en especial, cando, atendendo á necesidade de garantir unha xestión sa e prudente da entidade proxectada, non se considere adecuada a idoneidade dos accionistas que vaian ter nela unha participación significativa ou unha participación de tal forma que a porcentaxe de dereitos de voto ou de capital posuído resulte igual ou superior ao 5 por cento. Para estes efectos:

a) Entenderase por participación significativa nun banco aquela que cumpra co previsto no artigo 56 da Lei 26/1988, do 29 de xullo, sobre disciplina e intervención das entidades de crédito.»

Dous. O artigo 7 queda redactado do seguinte modo:

«Artigo 7. *Autorización de bancos suxeitos ao control de persoas estranxeiras.*

1. A creación de bancos españois cuxo control, nos termos previstos polo artigo 4 da Lei 24/1988, do 28 de xullo, do mercado de valores, vaia ser exercido por persoas estranxeiras, queda suxeita ao establecido nos artigos precedentes deste real decreto.

2. No caso de que o control do banco español vaia ser exercido por unha entidade de crédito, unha empresa de servizos de investimento ou unha entidade aseguradora ou reaseguradora autorizada noutro Estado membro da Unión Europea, pola entidade dominante dunha desas entidades, ou polas mesmas persoas físicas ou xurídicas que controlen unha entidade de crédito, unha empresa de servizos de investimento ou unha entidade aseguradora ou reaseguradora autorizada noutro Estado membro, o Banco de España, antes de emitir o informe a que se refire o punto 1 do artigo 1, deberá consultar coas autoridades responsables da supervisión da entidade de crédito, empresa de servizos de investimento ou entidade aseguradora ou reaseguradora estranxeira.

3. No caso de que o control do banco español vaia ser exercido por unha ou varias persoas, sexan ou non entidades de crédito, domiciliadas ou autorizadas nun Estado non membro da Unión Europea, caberá exixir a prestación dunha garantía que alcance a totalidade de actividades da dita entidade.»

Tres. O artigo 18 queda redactado do seguinte modo:

«Artigo 18. *Cómputo de participacións en entidades de crédito.*

1. Para os efectos do disposto no título VI da Lei 26/1988, do 29 de xullo, sobre disciplina e intervención das entidades de crédito, as accións, achegas ou dereitos de voto que se van integrar no cómputo dunha participación incluírán:

- a) Os adquiridos directamente polo adquirente potencial;
- b) Os adquiridos a través de sociedades controladas ou participadas polo adquirente potencial;
- c) Os adquiridos por sociedades integradas no mesmo grupo que o adquirente potencial ou participadas por entidades do grupo;
- d) Os adquiridos por outras persoas que actúen por conta do adquirente potencial, ou concertadamente con el ou con sociedades do seu grupo. En todo caso, incluíranse:

1.º Os dereitos de voto que se poidan exercer en virtude dun acordo cun terceiro que obrigue o adquirente potencial e o propio terceiro a adoptaren, mediante o exercicio concertado dos dereitos de voto que posúen, unha política común duradeira en relación coa xestión da entidade de crédito ou que teña por obxecto influír de maneira relevante nela;

2.º Os dereitos de voto que se poidan exercer en virtude dun acordo cun terceiro que prevexa a transferencia temporal e a título oneroso dos dereitos de voto en cuestión;

e) Os que posúa o adquirente potencial vinculados a accións adquiridas a través de persoa interposta;

f) Os dereitos de voto que se poidan controlar, declarando expresamente a intención de exercelos, como consecuencia do depósito das accións correspondentes como garantía;

g) Os dereitos de voto que se poidan exercer en virtude de acordos de constitución dun dereito de usufruto sobre accións;

h) Os dereitos de voto que estean vinculados a accións depositadas no adquirente potencial, sempre que este os poida exercer discrecionalmente en ausencia de instrucións específicas por parte dos accionistas;

i) Os dereitos de voto que o adquirente potencial poida exercer en calidade de representante, cando os poida exercer discrecionalmente en ausencia de instrucións específicas por parte dos accionistas;

j) Os dereitos de voto que se poden exercer en virtude de acordos ou negocios dos previstos nas letras f) a i), celebrados por unha entidade controlada polo adquirente potencial.

2. Os dereitos de voto calcularanse sobre a totalidade das accións que os atribúan, mesmo nos supostos en que o exercicio de tales dereitos estea suspendido.

3. Para os efectos do disposto no título VI da Lei 26/1988, do 29 de xullo, as accións, achegas ou dereitos de voto que se van integrar no cómputo dunha participación non incluírán:

a) As accións adquiridas exclusivamente para os efectos de compensación e liquidación dentro do ciclo curto de liquidación habitual. Para estes efectos, a duración máxima do ciclo curto de liquidación habitual será de tres días hábiles bolsistas a partir da operación e aplicarase tanto a operacións realizadas nun mercado secundario oficial ou noutro mercado regulado como ás realizadas fóra del. Os mesmos principios se aplicarán tamén a operacións realizadas sobre instrumentos financeiros.

b) As accións que se poidan posuír por ter proporcionado o aseguramento ou a colocación de instrumentos financeiros sobre a base dun compromiso firme, sempre que os dereitos de voto correspondentes non se exerzan ou utilicen para intervir na administración da entidade de crédito e se cedan no prazo dun ano desde a súa adquisición.

c) As accións posuídas en virtude dunha relación contractual para a prestación do servizo de administración e custodia de valores, sempre que a entidade só poida exercer os dereitos de voto inherentes ás ditas accións con instrucións formuladas polo propietario, por escrito ou por medios electrónicos.

d) As accións ou participacións adquiridas por parte dun creador de mercado que actúe na súa condición de tal, sempre que:

1.º Estea autorizado a operar como tal en virtude das disposicións que incorpore ao seu dereito nacional a Directiva 2004/39/CEE do Parlamento Europeo e do Consello, do 21 de abril de 2004, relativa aos mercados de instrumentos financeiros, e

2.º Que non interveña na xestión da entidade de crédito de que se trate, nin exerza influencia ningunha sobre ela para adquirir as ditas accións nin apoie o prezo da acción de ningunha outra forma.

e) As accións ou participacións incorporadas a unha carteira xestionada discrecional e individualizadamente sempre que a empresa de servizos de investimento, sociedade xestora de institucións de investimento colectivo ou entidade de crédito, só poida exercer os dereitos de voto inherentes ás ditas accións con instrucións precisas por parte do cliente.

4. Para levar a cabo o cómputo dunha participación para os efectos do disposto no punto 1, no caso de que o adquirente potencial sexa unha entidade dominante dunha sociedade xestora de institucións de investimento colectivo ou unha entidade que exerza o control dunha empresa de servizos de investimento, terase en conta o seguinte:

a) A entidade dominante dunha sociedade xestora de institucións de investimento colectivo non estará obrigada a agregar a proporción de dereitos de voto que atribúen as accións que posúa á proporción de dereitos de voto das accións que formen parte do patrimonio das institucións de investimento colectivo xestionadas

pola dita sociedade xestora, sempre que esta exerza os dereitos de voto independentemente da entidade dominante.

Non obstante o anterior, aplicarase o disposto nos puntos anteriores cando a entidade dominante ou outra entidade controlada por ela investise en accións que integren o patrimonio das institucións de investimento colectivo xestionadas pola sociedade xestora e esta careza de discrecionalidade para exercer os dereitos de voto correspondentes e poida unicamente exercelos seguindo as instrucións directas ou indirectas da entidade dominante ou doutra entidade controlada por ela.

b) A entidade que exerza o control dunha empresa que presta servizos de investimento non estará obrigada a agregar a proporción dos dereitos de voto que atribúan as accións que posúa á proporción que esta xestione de maneira individualizada como consecuencia da prestación do servizo de xestión de carteiras, sempre que se cumpran as seguintes condicións:

1.º Que a empresa de servizos de investimento, a entidade de crédito ou a sociedade xestora de institucións de investimento colectivo estean autorizadas para a prestación do servizo de xestión de carteiras nos termos establecidos no artigo 63.1 d) e 65 da Lei 24/1988, do 28 de xullo, do mercado de valores;

2.º Que só poida exercer os dereitos de voto inherentes ás ditas accións seguindo instrucións formuladas por escrito ou por medios electrónicos ou, no seu defecto, que cada un dos servizos de xestión de carteira se preste de forma independente de calquera outro servizo e en condicións equivalentes ás previstas na Lei 35/2003, do 5 novembro, de institucións de investimento colectivo, mediante a creación dos oportunos mecanismos, e

3.º Que exerza os seus dereitos de voto independentemente da entidade dominante.

Non obstante o anterior, aplicarase o disposto nos puntos anteriores cando a entidade dominante ou outra entidade controlada por ela investise en accións xestionadas por unha empresa de servizos de investimento do grupo e esta non estea facultada para exercer os dereitos de voto vinculados ás ditas accións e só poida exercer os dereitos de voto correspondentes a esas accións seguindo instrucións directas ou indirectas da entidade dominante ou doutra entidade controlada por ela.

5. As participacións indirectas tomaranse polo seu valor, cando o adquirente potencial teña o control da sociedade interposta, e polo que resulte de aplicar a porcentaxe de participación na interposta, no caso contrario.

Cando unha participación significativa se teña, total ou parcialmente, de forma indirecta, os cambios nas persoas ou entidades a través das cales se teña a dita participación deberán ser comunicadas previamente ao Banco de España, o cal se poderá opor segundo o previsto no artigo 58 da Lei 26/1988, do 29 de xullo.

6. Consideraranse sociedades controladas aquelas en que o adquirente potencial teña o control por darse algún dos supostos previstos no artigo 42 do Código de comercio e participadas aquelas nas cales se posúa, de maneira directa ou indirecta, polo menos un 20 por cento dos dereitos de voto ou do capital dunha empresa ou entidade, ou o 3 por cento se as súas accións están admitidas a cotización nun mercado regulado.

7. Para eses mesmos efectos, en todo caso, entenderase por influencia notable a posibilidade de nomear ou destituír algún membro do Consello de Administración da entidade de crédito.»

Catro. Engádesse un novo artigo 18 bis co seguinte teor literal:

«Artigo 18 bis. *Información que debe suministrar o adquirente potencial.*

1. O Banco de España establecerá mediante circular unha lista coa información que debe suministrar o adquirente potencial en cumprimento da obriga a que

se refire o artigo 57.1 da Lei 26/1988, do 29 de xullo, sobre disciplina e intervención das entidades de crédito. O Banco de España dará publicidade ao contido da lista na súa páxina web ou sede electrónica.

2. En todo caso, a lista a que se refire o punto anterior debe conter información acerca dos seguintes aspectos:

a) Sobre o adquirente potencial e, de ser o caso, sobre calquera persoa que de forma efectiva dirixa ou controle as súas actividades:

1.º A identidade do adquirente potencial, a estrutura do accionariado e a composición dos órganos de administración do adquirente potencial.

2.º A honorabilidade profesional e comercial do adquirente potencial e, de ser o caso, de calquera persoa que de forma efectiva dirixa ou controle as súas actividades.

3.º A estrutura detallada do grupo a que eventualmente pertenza.

4.º A situación patrimonial e financeira do adquirente potencial e do grupo a que eventualmente pertenza.

5.º A existencia de vínculos ou relacións, financeiras ou non, do adquirente potencial coa entidade adquirida e co seu grupo.

6.º As avaliacións realizadas por organismos internacionais da normativa de prevención do branqueo de capitais e financiamento do terrorismo do país de nacionalidade do adquirente potencial, salvo que sexa a dun Estado membro da Unión Europea, así como a traxectoria en materia de prevención do branqueo de capitais e do financiamento do terrorismo do adquirente potencial e das entidades integradas no seu grupo que non estean domiciliadas na Unión Europea.

No caso de Estados membros da Unión Europea, a información sobre esta traxectoria obterase na consulta que o Banco de España lles realice ás autoridades supervisoras deste Estado de acordo co artigo 69.7 da Lei 24/1988, do 28 de xullo.

b) Sobre a adquisición proposta:

1.º A identidade da entidade obxecto da adquisición.

2.º A finalidade da adquisición.

3.º A contía da adquisición, así como a forma e o prazo en que se levará a cabo.

4.º Os efectos que terá a adquisición sobre o capital e os dereitos de voto, antes e despois da adquisición proposta.

5.º A existencia dunha acción concertada de maneira expresa ou tácita con terceiros con relevancia para a operación proposta.

6.º A existencia de acordos previstos con outros accionistas da entidade obxecto da adquisición.

c) Sobre o financiamento da adquisición:

Orixe dos recursos financeiros empregados para a adquisición, entidades a través das cales se canalizarán e réxime de dispoñibilidade deles.

d) Ademais, exixírase:

1.º No caso de participacións significativas que produzan cambios no control da entidade, detallarase o plan de negocio, incluíndo información sobre o plan de desenvolvemento estratéxico da adquisición, os estados financeiros e outros datos previsionais. Así mesmo, detallaranse as principais modificacións na entidade que se vai adquirir previstas polo adquirente potencial. En particular, sobre o impacto que a adquisición terá no goberno corporativo, na estrutura e nos recursos dispoñibles, nos órganos de control interno e nos seus procedementos para a prevención do branqueo de capitais e do financiamento do terrorismo.

2.º No caso de participacións significativas que non produzan cambios no control da entidade, informárase sobre a política do adquirente potencial en relación coa adquisición e coas súas intencións respecto da entidade adquirida, en particular, sobre a súa participación no goberno da entidade.

3.º Nos dous casos anteriores, os aspectos relativos á honorabilidade comercial e profesional de administradores e directivos que vaian dirixir a actividade da entidade de crédito como consecuencia da adquisición proposta.»

Cinco. Engádesse un novo artigo 18 ter co seguinte teor literal:

«Artigo 18 ter. *Interrupción do prazo para resolver.*

1. O Banco de España poderá determinar que a interrupción do cómputo do prazo de avaliación mencionada no artigo 58.3 da Lei 26/1988, do 29 de xullo, teña unha duración máxima de trinta días hábiles, se o adquirente potencial:

- a) Está domiciliado ou autorizado fóra da Unión Europea, ou
- b) Non está suxeito a supervisión financeira en España ou na Unión Europea.

2. O cómputo dos trinta días hábiles previsto no artigo 58.1 da Lei 26/1988, do 29 de xullo, para que o Servizo Executivo da Comisión para a Prevención do Branqueo de Capitais e Infraccións Monetarias remita o seu informe ao Banco de España, interromperase nos mesmos termos en que este interrompa o cómputo do prazo de avaliación de acordo co artigo 58.3 da citada lei.»

Seis. O artigo 19 queda redactado do seguinte modo:

«Artigo 19. *Información sobre a estrutura de capital das entidades de crédito.*

Con independencia da obrigaón establecida no punto 1 do artigo 61 da Lei 26/1988, do 29 de xullo, as entidades de crédito comunicarán ao Banco de España, na forma que este estableza, durante o mes seguinte a cada trimestre natural, a composición do seu capital social, relacionando todos os accionistas, no caso dos bancos e establecementos financeiros de crédito, ou todos os tedores de achegas, no caso das cooperativas de crédito, que ao final do dito período teñan a consideración de entidades financeiras e os que, non o sendo, teñan inscritas ao seu nome accións ou achegas que representen unha porcentaxe do capital social da entidade igual ou superior ao 0,25 por 100, no caso dos bancos, do 1 por 100 no das cooperativas de crédito, ou do 2,50 por 100 no dos establecementos financeiros de crédito.»

Artigo segundo. *Modificación do Real decreto 692/1996, do 26 de abril, sobre o réxime xurídico dos establecementos financeiros de crédito.*

O Real decreto 692/1996, do 26 de abril, sobre o réxime xurídico dos establecementos financeiros de crédito, queda modificado como segue:

Un. O punto 3 do artigo 4 queda redactado do seguinte modo:

«3. No caso de que o control do establecemento financeiro de crédito español vaia ser exercido por unha ou varias persoas, sexan ou non entidades de crédito, domiciliadas ou autorizadas nun Estado non membro da Unión Europea, caberá exixir a prestación dunha garantía que alcance a totalidade de actividades da dita entidade.»

Dous. O primeiro parágrafo e a letra a) do punto 1 do artigo 7 quedan redactados do seguinte modo:

«1. A ministra de Economía e Facenda denegará, mediante resolución motivada, a autorización de creación dun establecemento financeiro de crédito

cando non se cumpran os requisitos establecidos nos artigos 5 e 6 anteriores e, en especial, cando, atendendo á necesidade de garantir unha xestión sa e prudente da entidade proxectada, non se considere adecuada a idoneidade dos accionistas que vaian ter nela unha participación significativa ou unha participación de tal forma que a porcentaxe de dereitos de voto ou de capital posuído resulte igual ou superior ao 5 por cento. Para estes efectos:

a) Entenderase por participación significativa aquela que cumpra cos termos previstos no artigo 56 da Lei 26/1988, do 29 de xullo, sobre disciplina e intervención das entidades de crédito.»

Disposición derogatoria única. *Derogación normativa.*

Quedan derogadas cantas normas de igual ou inferior rango se opoñan ao disposto neste real decreto.

Disposición derradeira primeira. *Modificación do Real decreto 716/2009, do 24 de abril, polo que se desenvolven determinados aspectos da Lei 2/1981, do 25 de marzo, de regulación do mercado hipotecario e outras normas do sistema hipotecario e financeiro.*

O punto 3 do artigo 8 do Real decreto 716/2009, do 24 de abril, polo que se desenvolven determinados aspectos da Lei 2/1981, do 25 de marzo, de regulación do mercado hipotecario e outras normas do sistema hipotecario e financeiro, queda redactado nos seguintes termos:

«3. A certificación deberase basear nun informe de taxación no cal se recollerán os aspectos xurídicos e técnicos que inflúan na valoración do ben e que constitúen as súas características básicas definitorias, así como o conxunto de cálculos técnico-económicos conducentes a determinar o valor final da taxación.

O informe técnico de taxación, así como o certificado en que se poderá sintetizar este, terá que ser asinado necesariamente por un arquitecto, aparellador ou arquitecto técnico, enxeñeiro ou enxeñeiro técnico da especialidade correspondente segundo o réxime competencial profesional marcado pola natureza do obxecto da taxación. Este informe non terá que ser visado polo colexio oficial respectivo e caducará ao seis meses da data da súa sinatura.»

Disposición derradeira segunda. *Habilitacións normativas.*

A ministra de Economía e Facenda e, coa súa habilitación expresa, o Banco de España poderán dítar as disposicións precisas para a debida execución deste real decreto.

Disposición derradeira terceira. *Título competencial.*

Este real decreto dítase ao abeiro do artigo 149.1.11.^ª e 13.^ª da Constitución, que lle atribúe ao Estado as competencias exclusivas sobre as bases da ordenación do crédito, banca e seguros e as bases e coordinación da planificación xeral da actividade económica, respectivamente.

Disposición derradeira cuarta. *Incorporación de dereito da Unión Europea.*

Mediante este real decreto incorpórase ao dereito español a Directiva 2007/44/CE do Parlamento e do Consello, do 5 de setembro de 2007, pola que se modifican a Directiva 92/49/CEE do Consello e as directivas 2002/83/CE, 2004/39/CE, 2005/68/CE e 2006/48/CE no que incumbe ás normas procedementais e aos criterios de avaliación aplicables en relación coa avaliación cautelara das adquisicións e dos incrementos de participacións no sector financeiro.

Disposición derradeira quinta. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 27 de novembro de 2009.

JUAN CARLOS R.

A vicepresidenta segunda do Goberno
e ministra de Economía e Facenda,
ELENA SALGADO MÉNDEZ